

Revanche

n verhoal ien t Grunnegers deur Bé Kuipers

Ik vulde me altied slim ongemakkelk, laankoet op vlouer van kantoor, ien n muurvaste houd-greep. En din heb ik t ins nog nait over mien smereg goud noatied, vanwege t stovvige lino-leum. Hai haar mie zegd dat ik oftikken kon as ik t benauwd kreeg of as t zeer dee, wat ik ook mor al te geern dee. Triomfantelk laggend kwam hai din as eerste weer ienten.

Leo Lap was lid van judoverainen bie hom ien dörp en dee ook aan karate. Hai was even older as ik, n fanetieke sportman dij mor aingoaal muileke judo-oefenings veurdoun wol, mit kop rood van inspannen en mit veul gepoest en gestin. En altied mit ain van zien collegoa's as 'sparingpartner'. Voak ook mit mie. Mor ik zag miezulf meer as slachtovver. Ik kon nait tegen hom op. Hai was veul staarker en ik kon ook nait tegen zien proatjes. Hai wis mie mor aal weer te verlaaiden om mit mie n nije judogreep te demonstreren.

We mouken ook wel es gebruik van zien kracht, misbruuk meschain wel. Swoare dingen tillen of n kaast verslepen. Wie vonden t makkelk en t streelde hóm. Mor of hai dat dou ook deur haar...? li dink van nait. Ik haar wel n vrezelke hekel aan t op peerd zetten van Leo. Hai wer der aal aigenwiezer van. En doar kon ik hail min over.

Omreden ik dij judodemonstroatsies mit mie slim vernedernd von, heb ik mie aanmeld bie n bokscub. Ik wol nait aingoaal minderman wezen, ik wol Leo partij geven kinnen, n krachteger oetstroalen hebben. Ik wol mie nait meer slachtovver vuilen. En zo ging ik mit n stuk of wat krougmoaten ale moandagoavonds noar sportschoul Van der Deen ien Stad. Dat was ien n leegstoande, olle schoul in de buurt van t Noorderplantsoen. Douchen kon wie der nait en noatied gingen wie doalek noar ons stamkroug. Wie kregen der slim dörst van.

Mor ik bin der gaauwachteg weer mit stopt, van ik was kompleet overvalen en verwonderd vanwege de enorme agressie van aander clubleden. Dij slougen zo gewelddoadeg op mie ien, dat ik ter voak mit n dikke lip of n blaauw oog vandoan kwam. Zai haren totaal gain meedlieden mit n begunneling as ik.

Ienstructeur haar mie al even apaart nomen. Hai zaag wel dat zien lezzen nait zo aan mie besteed waren en hai stuupte mie nog n moal vannijs goud ien: "Mos baaide voesten en elbogen bie nkander veur kop en borst holden, om steuten op te vangen en zo vanoet dij positsie mit ain voest snelle oetvalen doun, n rechtse directe of n uppercut. Nooit dien dekking sakken loaten", zee kerel mor aal weer. t Ging nait zozeer om kracht as wel om snelheid en behendigheid. Ach, sportief was ik nait en ook nait handeg en vlug genog. Mor as ik veul trainde kon dat nog best kommen...

Meschain kwam dij grimmege sfeer ook wel van n twijddailen dij der ontstoan was deur komst van ons, nije leden. Der was ook haildaal gain contact over en weer. Dij aander clubleden, heurden wie loader, kwammen oet buurten doar ik snaachts laiver nait allain over stroat lopen wol en meschain overdag ook wel nait. Waarkloze jonges mit mor naauw loagere schoul... n Kolossoal veuroordail, ik wait t. Mor ik zaag t veur mien ogen. Dizze jonges wollen mor ain ding. Ons op bek haauwgen, op ons ienbeuken, ons verslóagen! En ze keken ons aan mit ieskolle ogen, stoalhaard. As k ter nog aan dink, mout k weer huvern.

Ik heb dou veurgoud de bokssport - en vechtsporten ien t algemeen - rug toudraaid. Ik haar aaltied begrepen dat ter haile nobele bedoulens achter zaten. Dat t aankwam op zulfbeheers-en en sportiviteit. En ook, jongens van stroat ofholden, dat ze heur agressie hier ofreageren konden. t Zel wel en t kin morzo. Mor nait weer mit mie as sparringpartner.

Toch hebben wie Leo ain moal vrezelk bie bain had mit n karateslag. Wie waren apmoal al n haile zet stinzat van zien gesnak en zien judogrepen. Hou t kwam wait ik nait meer, mor ienains bedochten wie n grap mit Leo, of t ien lucht hong. Boazen waren dij mirreg vot en wie haren t riek aleneg. Constructeur Medemoa haar nou min of meer de laaiden. n Man van begun vaddeg, al wat koalend, wit overhemd aan en strik veur. Mor hai hil ook nog wel van wat gekhaid, t was nog n jonkerel mit. Medemoa zol Leo oetdoagen om n grieze gasbetonstain oet onze documentoatsiekaast mit blode haand ien ainmoal middendeur te haauwgen. Boeten t zicht van Leo haar wie eerst n opstellen moakt mit zo'n stain. Dou wer Leo der bie hoald. Nou, dat wol e wel ais zain en ongeloveg kwam e der bie stoon, ienspecteerde stain en opstellen.

Mit veul poewaai en alerhande bezwerings draaide Medemoa om stain tou. Mit opzet dee e nog extroa onhandeg, om iendruk te wekken dat hai volgens Leo haildaal gain kaans haar. Leo ston derbie en laagde meewoareg. Medemoa krolde eerst nog oetgebraaid maauwen omhoog, nam dou n aanloop, zwoide hoog mit rechterhaand, belkte dramooties - en sloug. Stain bonkte ien twij helften op vlouer. Mor, hail aans as ik dochte, Leo was hail nait verboasd of verrast. Hai laagde wat zenewachteg en wol doalek revanche. Dit mos hai ook kinnen - èn veul beder. Hai wipte der over van spannen.

Stukken stain werden gaauw weghoald en n aander stain, persies net zo'n gasbetonstain, wer der hail secuur weer hinzet. Nou was t Leo zien beurt. Zenewachteg dribbelde Leo der omtou, taxaaierde stain, vuilde aan zien haand en concentreerde hom slim. Hai zette vouten steveg op grond, boog n beetje deur knijen, vuilde nog weer even aan rugkaant van rechterhaand, stook hom omhoog en lait hom op ooghoogte even stilhangen, net as n diregent vlak veur t begun van n stuk meziek. Zien ogen stonden star op stain ien opperste concentratoatsie... Dou sloug e ienainen mit n keihaarde karatekreet tou. Ik schrok ter van, dat hai zo'n raauw geluud oet zien ströt krieggen kon. t Dee mie zeer aan oren.

t Was n flits, n dovve klap. Mor stain bleef hail... Verwonderd vuilde Leo aan haand en keek noar stain. Hai zee niks en keek ons ook nait aan, was haildaal ien homzulf keerd, ien trance. Hai verzette stain n beetje op ondersteunens, bekeek hom van ale kanten. Dou weer vannijs oetgebraaid t rituaail van vouten, knijen, haand, kuren, concentratoatsie... Dou sloug e nog n moal, haarder.

Weer mis. Haar hai din meschain toch n verkeerde taxoatsie moakt? Nog te zaacht, of net nait op t juuste punt haaugen? Nóg n moal sloug Leo, nóg haarder. Mor zunder resultaat. Leo wer al fanetieker en drierster, van t mos toch kinnen. Hai wipte en dribbelde om stain tou. Haarder en haarder sloug e op stain zunder pauzes nou, zunder laange concentratoatsies en al vlugger achter nkander. En wie mor roupen van: "Kom op Leo. Loat die nait kisten. Potverdorie, doe kins ja karate. Sloag der op man. Háárder..." Zo stonden wie der omtou te joelen, hom aan te hiezen. Al onze frustratoatsies over zien gesnak en parmanteg gedoude mit zien judo-oefenings kwamen der oet, ook - en benoam bie mie. Hai kreeg zien verdainde loon. Kerel wat genoot ik van zien vernedern.

Leo poeste swoar deur neus, kop was hom vuurrood, swait laip hom ien krinkelstroomkes bie sloapen deel en zien overhemd op rug en onder aarms was dwaarsdeurnat. Hai jankte van pien en ongelooft. Dat Medemoa, dij totaal nait aan sport dee - hai haar al n begunnend buukje - en dij Leo ien ain bewegen laankoet op grond krieggen zol, ien loopweg even zo'n stain kepot sloug, dat kon Leo nait verkroppen. Wel tien moal sloug e mit kaant van haand, tot bloudens aan tou, mor t belukte hom nait.

Aigelk was t hail gemain van ons, dink ik nou. Ik haar destieds meschain wel dezulfde wroak-, dezulfde revancegevuilens, as dij waarkloze sportschoujonges.